



## SAOPĆENJE ZA JAVNOST

### **Nakon serije teških krađa u Brčkom Određen jednomjesečni pritvor S.K.**

(Brčko, 13.8.2024. godine)

Postupajući po prijedlogu Tužilaštva Brčko distrikta BiH, Osnovni sud odredio je jednomjesečni pritvor S. K (33)\*, osumnjičenom da je prethodnih dana u Brčkom počinio seriju teških krađa. Višestrukom povratniku u vršenju ovog krivičnog djela, pritvor je određen usljed opasnosti da bi mogao ponoviti krivično djelo za koje se može izreći kazna zatvora tri godine ili teža kazna.

Tužilaštvo i Policija Brčko distrikta BiH intenzivno sprovede istragu protiv S. K. zbog teških krađa koje je u prethodne dvije sedmice, u tri navrata, počinio nakon provaljivanja u stambene i ugostiteljske objekte u ovom gradu. Sumnja se da je najprije 27. jula u ulici Sarajevska došao do jedne porodične kuće, ušao u otključanu garažu u sklopu kuće, a zatim iz garaže ušao u drugu prostoriju, odakle je oduzeo dijelove bakarnog kazana i druge stvari vlasnika ukupne vrijednosti 1.500,00 KM. Njega se sumnjiči i da je dva dana kasnije došao do još jedne porodične kuće u istoj ulici i upotrebom fizičke snage razvalio ulazna vrata objekta, udaljivši se pošto je uočen. Usto, njega se sumnjiči da je 04. avgusta došao do restorana *Kutak u ulici Miroslava Krleže*, te fizičkom snagom djelovao na ulazna vrata i ušao u unutrašnjost objekta, odakle je oduzeo novac u iznosu od oko 100,00 KM - navodi se u tužilačkom prijedlogu za određivanje pritvora.

Pošto je ubrzo otkriven i lociran, osumnjičeni je uhapšen 7. avgusta, a nakon zadržavanja i kriminalističke obrade u Policiji, sproveden je u prostorije Tužilaštva. Kao što je to Policija prethodno učinila, i Tužilaštvo je osumnjičenog zadržalo tokom 24 sata, ispitavši ga za to vrijeme u svojstvu osumnjičenog, nakon čega je podnijelo prijedlog sudu da mu odredi pritvor. Prijedlog za određivanje pritvora obrazložen je postojanjem opasnosti da bi osumnjičeni boravkom na slobodi mogao ponoviti krivično djelo za koje se može izreći kazna zatvora tri godine ili teža kazna. Prihvativši tužilački prijedlog, Osnovni sud odredio je pritvor S. K. u trajanju od jednog mjeseca, koji počinje teći od momenta lišenja slobode. Uz pritvaranje osumnjičenog, Tužilaštvo i Policija nastavljaju istragu usmjerenu na dokazivanje krivičnog djela teške krađe (*iz člana 281 stav 1 tačka 1) Krivičnog zakona Brčko distrikta BiH*) i njegovo daljnje procesuiranje.

\*Ovom objavom ne prejudicira se ishod krivičnog postupka i ne narušava princip presumpcije nevinosti.  
Svako se smatra nevinim dok se pravosnažnom presudom ne utvrdi njegova krivica.

GLAVNI TUŽILAC

**ZEKERIJA MUJKANović**